

四庫全書

史部

欽定四庫全書

史部

經義考卷二百

八十七至  
九十

詳校官編修<sub>臣</sub>李堯棟

編修<sub>臣</sub>程嘉謨覆勘

總校官知縣

<sub>臣</sub>

繆

琪

校對官編修

<sub>臣</sub>

勵守謙

謄錄監生

<sub>臣</sub>

熬意誠

欽定四庫全書

經義考卷二百八十七

翰林院檢討朱彝尊撰

刊石

漢一字石經

隋志一字石經周易一卷

七錄三卷

一字石經尚書六

卷

唐志五卷七錄有今字石經鄭氏尚書八卷

一字石經魯詩六卷

七錄

有毛詩

三卷亡

一字石經儀禮九卷

唐志四卷

一字石經春秋

一卷一字石經公羊傳九卷一字石經論語一卷

七錄二卷

唐志同

佚

後漢書靈帝本紀熹平四年春三月詔諸儒正五經  
文字刻石立於太學門外

蔡邕傳蔡邕字伯喈陳留圉人拜中郎校書東觀遷  
議郎邕以經籍去聖久遠文字多謬俗儒穿鑿疑誤  
後學熹平四年乃與五官中郎將堂谿典光祿大夫

楊賜諫議大夫馬日磾議郎張馴韓說太史令單颺等奏求正定六經文字靈帝許之邕乃自書丹於碑使工鐫刻立於太學門外於是後儒晚學咸取正焉碑始立觀視及摹寫者車乘日千餘兩填塞街陌

摯虞三輔決錄注馬日磾字翁叔馬融之族子少傳

融業歷位九卿遂登台輔

魏志官太傅

後漢書韓說傳說字叔儒會稽山陰人舉孝廉中平二年遷江夏太守

單颺傳颺字武宣山陽湖陸人舉孝廉稍遷太史令  
出為漢中太守

張馴傳張馴字子儁濟陰定陶人辟公府舉高第拜  
議郎與蔡邕共奏定六經文字擢拜侍中光和七年  
徵拜尚書遷大司農

儒林傳黨人既誅其高名善士多坐流廢後遂至忿  
爭更相告言亦有私行金貨定蘭臺漆書經字以合  
其私文熹平四年靈帝乃詔諸儒正定五經刊於石

碑為古文篆隸三體書法以相參檢樹之學門

宦者傳時宦者汝陽李巡以為諸博士試甲乙科爭  
第高下更相告言至有行賂定蘭臺漆書經字以合  
其私文者廼白帝與諸儒共刻五經文於石於是詔  
蔡邕等正其文字自後五經一定爭者用息

謝承後漢書碑立太學門外瓦屋覆之四面闌障開  
門於南河南南郡設吏卒視之

袁宏後漢紀熹平四年春三月五經文字刻石立於

太學之前

楊龍驤洛陽記太學在洛城南開陽門外講堂長十

丈廣二丈

羊頭山記  
作三丈

堂前石經四部本碑凡四十六

枚西行周易尚書公羊傳十六碑存十二碑毀南行  
禮記十五碑悉崩壞東行論語三碑二碑毀禮記碑  
上有諫議大夫馬日磾議郎蔡邕名

楊銜之洛陽伽藍記開陽門外御道東有漢國子學  
堂堂前有三種字石經二十五碑表裏刻之寫春秋



尚書二部作篆科斗隸三種字漢右中郎將蔡邕筆  
之遺跡也猶有十八碑餘皆殘毀復有石碑四十八  
枚亦表裏隸書寫周易尚書公羊禮記四部又讀書  
碑一所並在堂前魏文帝作典論六碑至太和十七  
年猶有四存

酈道元水經注漢靈帝光和六年刻石鏤碑載五經  
立於太學講堂前悉在東側蔡邕以熹平四年與五  
官中郎將堂谿典光祿大夫馬日磾議郎張馴韓說

太史令單颺等奏求正定六經文字靈帝許之邕乃  
自書丹於碑使工鐫刻立於太學門外於是後儒晚  
學咸取正焉及碑始立其觀視及筆寫者車乘日千  
餘兩填塞街陌矣今碑上悉銘刻蔡邕等名魏正始  
中又立古篆隸三字石經魏初傳古文出邯鄲淳石  
經古文轉失淳法樹之於堂西石長八尺廣四尺列  
石於其下碑石四十八枚廣三十丈魏文帝又刊典  
論六碑附於其次陸機言太學贊別一碑在講堂西

下列石龜碑載蔡邕韓說高堂谿等名太學弟子贊  
復一碑在外中門今二碑並無石經東有一碑是漢  
順帝陽嘉八年立猶存不破漢石經北有晉辟雍行  
禮碑是太始二年立其碑中折但世代不同物不停  
故石經淪缺存半毀幾駕言永久諒同憮焉

江式曰蔡邕採李斯曹喜之法為古今雜形詔於太  
學立石碑刊載五經題書楷法多是邕書後開鴻都  
諸方獻篆無出邕者

北史劉芳傳漢世造三字石經於太學學者文字不正多往質焉芳音義明辨時號劉石經

隋書經籍志後漢鐫刻七經著於石碑皆蔡邕所書魏正始中又立一字石經相承以為七經正字後魏之末齊神武執政自洛陽徙於鄴都行至河陽值岸崩遂沒於水其得至鄴者不盈大半至隋開皇六年又自鄴京載入長安置於祕書內省議欲補緝立於國學尋屬隋亂事遂寢廢營造之司因用為柱礎貞

觀初祕書監臣魏徵始收聚之十不存一其相承傳拓之本猶在祕府

劉焯傳開皇六年運洛陽石經至京師文字磨滅莫能知者焯奉勅與劉炫等考定

韋述西京新記曰貞觀中祕書監魏徵參詳考驗蔡邕三字石經凡十數段請於九成宮祕書監內置之  
後天后移于著作院

實蒙述書賦注蔡邕書今見打本三體石經四紙石

既尋毀其本最希

郭忠恕汗簡曰後漢中郎蔡邕寫三體六經邪臣矯  
嫉未盈一紀尋有廢焉

林罕曰蔡邕於國學所立石經或云隸省者即隸減  
也少減曰省乃是隸書於篆書中減省點畫而已非  
是官省之省

李緯曰東都頃年創造防秋館穿掘多得蔡邕鴻都  
學所書石經後洛中人家往往有之

張舜民曰嘉祐末得石經二段於洛陽城乃蔡邕隸  
書論語

方甸曰石經殘碑在洛陽張景元家世傳蔡中郎書  
未知何所據漢靈帝熹平四年邕以古文篆隸三體  
書五經刻石於太學至魏正始中又為一字石經相  
承謂之七經正字今此所傳皆一體隸書必魏世所  
立者然唐經籍志又有邕今字論語二卷豈邕五經  
之外復為此乎據隋經籍志凡言一字石經皆魏世

所為有一字論語二卷不言作者之名而唐志遂以  
為蔡邕所作則又疑唐史傳之之誤也蓋自北齊遷  
邕石經於鄴都至河濱岸崩石沒於水者幾半隋開  
皇中又自鄴運入長安未及緝理尋以兵亂廢棄唐  
初魏鄭公鳩集所餘十不獲一而傳拓之本猶存祕  
府史所謂三字石經者即邕所書然當時一字石經  
存者猶數十卷而三字石經止數卷而已由是知漢  
石經之亡久矣不能若此之多也魏石經近世猶存



五代湮滅殆盡往年洛陽守因閱營造司所棄碎石  
識而收之遂加意搜訪凡得尚書儀禮論語合數十  
段又有公羊碑一段在長安其上有馬日磧等名號  
者魏世用日磧等題名本在禮記碑而此乃在公羊  
碑上益知非邕所為也尚書論語之文與今多不合  
者非孔安國鄭康成所傳之本也獨公羊當時無他  
本故其文與今文無異皆殘闕已甚句讀斷絕一篇  
之中或不存數字可勝惜哉

歐陽棐集古目錄曰古文篆隸三體凡八百二十九字後漢熹平中校定五經使蔡邕以三體書今其名亡失皆盡皇祐中有蘇望者得摸本左傳於故相王文康家取其完者而刻之莫辨其真偽也在洛陽蘇氏家

趙明誠金石錄曰石經遺字者藏洛陽及長安人家蓋靈帝熹平四年所立其字則蔡邕小字八分書也其後屢經遷徙故散落不存今所有者纔數千字皆

土壤埋沒之餘磨滅而僅存者爾按後漢書儒林傳  
叙云為古文篆隸三體者非也蓋邕所書乃八分而  
三體石經乃魏時所建也又按靈帝紀言詔諸儒正  
五經文字刻石立於太學門外蔡邕傳乃云奏求正  
定六經文字既已不同而章懷太子注引洛陽記所  
載有尚書周易公羊傳論語禮記今余所藏遺字有  
尚書公羊傳論語又有詩儀禮然則當時所立又不  
止六經矣洛陽記又云禮記碑上有諫議大夫馬日

碑議郎蔡邕等名今論語公羊後亦有堂谿典馬日  
碑等姓名尚在據邕傳稱邕以經籍去聖久遠文字  
多謬俗儒穿鑿疑誤後學乃奏求正定自書於碑於  
是後儒晚學咸取正焉今石本旣已磨滅而歲久轉  
寫日就訛舛以世所傳經書本校此遺字其不同者  
已數百言又篇第亦時有小異使完本具存則其異  
同可勝數耶然則豈不可惜也哉而後世學者於去  
古數千百歲之後盡絀前代諸儒之論欲以己之私

意悉通其說難矣余既錄為三卷又取其文字不同者具列於卷末云

董道廣川書跋曰蔡邕鐫刻七經著於石碑當時號鴻都三字纔三十年兵火繼遭碑亦損缺魏正始中又立一字石經相承以為七經正字後魏武定四年移洛陽漢魏石經於鄴魏末齊神武自洛陽徙於鄴都河陽河岸崩遂沒於水其得至鄴者殆不得其半周大象中詔徙鄴城石經於洛時為軍人破毀至有

竊載還鄴者船壞沒溺不勝其衆也其後得者盡破  
為橋基隋開皇六年自鄴京載入長安置於祕書內  
省議欲補緝立於國學會亂遂廢營造之司用為柱  
礎貞觀初魏徵始收聚之十不一存其相承傳拓之  
本猶在祕府當時考驗至詳謂不盡為邕如馬日磾  
數輩相與成之然漢隸簡古深於法度亦後世不及  
故兼存之趙綽曰唐造防秋館時穿地多得石經故  
洛中人士逮今有之考當時所得已是漢世所遺沒

而得者國初開地唐御史府得石經十餘石此又唐末淪沒之所出也

又曰朱越石與兄書曰石經文都闕碑高一丈許廣

四尺駢羅相接太學在南明門外講堂長十丈廣三尺堂前石經四部本碑四十六枚元魏時西行尚書周易公羊傳十六碑存十二碑毀南行禮記十五碑悉崩壞東行論語三碑毀禮記但存諫議大夫馬日磾議郎蔡邕名當是時尚有碑十八楊銜之謂得四

十八碑誤也洛陽昔得石經尚書段殘破不屬蓋盤  
庚洪範無逸多士多方總二百三十六字其文與今  
尚書盡同間有異者纔十餘然則古文尚書蓋已見  
於此或曰魏亦作石經安知此為漢所書哉余謂魏  
為一字漢為三字此得相亂耶且天命自度碑作亮  
惠鮮鰥寡碑作惠于矜寡乃逸既誕作乃憲既延治  
民祇懼作以民肆高宗享國五十九年作百年以書  
考之知傳受謠誤不若碑之正也 又曰石經今廢



不存或自河南御史臺發地得之蓋論語第一篇并第十四篇為一碑亡其半矣其可識者字二百七十又自第十八篇至第二十篇為一碑破闕殘餘得五之一其存字為三百五十七以今文論語校之其異者若抑與之與為意與之我未見好仁者惡不仁者作未見好仁惡不仁朝聞道夕死可矣作可也有三年之愛於其父母無乎字惡居下流而無流字年四十而見惡焉無焉字鳳兮鳳兮作何得之衰往者不

可諫也來者猶可追也今本皆異執輿者為誰而作  
執車者為誰子是魯孔丘與曰是然後曰是知津矣  
比今書多二字輟而不輟作輟夫子憮然植其杖作  
置其斯而已矣作其斯以乎子游作子旂而在蕭牆  
之內作而在于蕭牆之內凡碑所存校其異者已十  
五之一矣使鴻都舊書盡存則其異可知也夫以邕  
之所定雖未盡善然漢儒學專其校定衆家得正謬  
誤多矣

姚寬西溪叢語曰蔡中郎石經漢靈帝熹平四年邕以古文篆隸三體書五經刻石於太學至魏正始中又為一字石經相承謂之七經正字唐志又有今字論語二卷豈邕五經之外復有此乎隋經籍志凡言一字石經皆魏世所為有一字論語二卷不言作者之名遂以為邕所作恐唐史誤北齊遷邕石經於鄴都至河瀆岸崩石沒於水者幾半隋開皇中又自鄴運入長安尋兵亂廢棄唐初魏鄭公鳩集所餘十不

獲一而傳拓之本猶存祕府當時一字石經猶數十  
卷三字石經止數卷而已由是知漢石經之亡久矣  
魏石經近世猶存湮滅殆盡往年洛陽守因閱營造  
司所棄碎石識而取之凡得尚書論語儀禮合數十  
段又有公羊傳碑一段在長安其上馬日磧等所正  
定之本據洛陽記日磧等題名本在禮記而日磧乃  
在公羊碑益知非邕所為也尚書論語之文今多不  
同非孔安國鄭康成所傳之本也獨公羊當時無他

本故其文與今文無異然皆殘闕已甚宋敏求洛陽  
記云漢靈帝詔諸儒正定五經刊石熹平四年蔡邕  
與五官中郎將堂谿典光祿大夫馬日磾議郎張馴  
韓說太史令單颺等奏定六經刊於碑後諸儒晚學  
咸取正焉及碑始立其觀視及筆寫者車乘日千餘  
兩填塞街衢其碑為古文篆隸三體立太學門外又  
云魏正始中立篆隸古文三字石經又刊文帝典論  
六碑附其次於太學又非前所謂一字石經也又晉

石經隸書至東魏孝靜遷於鄴世所傳一字石經即  
晉隸書又非魏碑也今漢碑不存晉魏石經亦謬謂  
之蔡邕字矣唐祕書省內有蔡邕石經數十段後魏  
末自洛陽徙至東宮又移將作內坊貞觀四年魏徵  
奏於京師祕書內省置武后復徙於祕書省未知其  
一字與三字也

黃伯思東觀餘論曰漢石經與今文不同者殊多今  
畧記之書女母翁侮成人

今本女無  
侮老成人

保后胥高

保后  
胥戚

女永勸憂

女誕勸憂

女有近則在乃心

今近作我

女比猶念以

相從

今作女分猷

各翕中

各設中

爾惠朕曷祗動萬民以遷

爾謂朕曷震動

天既付命

今付作孚

曰陳其五行

今汨陳

嚴恭寅畏

天命自亮以民祗懼

今亮作度以作治

懷保小人惠于矜寡

今人作民于作解

母兄曰

無皇曰

則兄自敬德

兄作皇

且以前人

之微言

今作微言

是罔顯哉厥世

今哉作在

文王之鮮光

今作耿光

通殷就大命

連殷集大命

論語意與之與

今意作抑

孝于惟孝

今于作乎

朝聞道夕死可也

今也作矣

是魯孔丘與曰是是知

津矣

是魯孔丘與曰是也曰是知津矣

耒不輟子路以告子憊然

耒而

不輟子路行以告夫子憊然

置其杖而耘

今置作植

其斯以乎

其斯而已矣

譬諸宮牆

今諸作之

賈諸賈之哉

今賈作沽

又論語每篇各計

其章數其最後云凡二十篇萬五千七百一十字又

記諸家異聞之語若曰在於蕭牆之內蓋毛包周氏

於今論語無蓋氏毛氏書此石刻在洛陽本在洛宮

前御史臺中年久摧散洛人好事者時時得之若騏

驥一毛虬龍片甲今張燾龍圖家有十版最多張氏



堦家有五六版王晉玉家有小塊洛中所有者止此  
予皆得其拓本論語之末題云詔書與博士臣左立  
郎中臣書上臣下皆缺當是著書者姓名或云此即  
蔡邕書姓名既亡無以辨之獨刻者陳興姓名甚完  
何其幸歟又有一版公羊不知誰氏所得其末云谿  
典諫議大夫臣馬日磾臣趙陟議郎臣劉弘郎中臣  
張文臣蘇陵臣傅楨雜雜未詳下谿上缺谿上當是堂  
謂堂谿典也此蓋鴻都一字石經然經各異手書不

必皆蔡邕也三字者不見真刻獨此一字者乃當時所刻字畫高古精善殊可寶重開元中嘗藏拓本於御府以開元二字小印印之與法書名畫同藏蓋唐世以前未錄前代石刻獨此見收其可寶如此

邵博聞見錄曰近年洛陽張氏發地得石十數漢蔡伯喈隸尚書禮記論語各已壞闕論語多可辨每語必他出至十數語則曰凡章若干如朝聞道夕死可也如鳳兮鳳兮何而德之衰如執車者為誰子子路

曰為孔丘曰是魯孔丘與曰是是知津矣如置其杖而耘等語校今世本為異尚書高宗饗國百年今世本肆高宗享國五十有九年為異甚初熹平四年伯喈以經讀遭穿鑿謬妄同馬日磾等以前聞攷正自書立石洛陽太學門下摹寫者日千人車乘填塞至隋開皇六年遷其石於長安文字剝泐不可知詔問劉焯劉炫能盡屈羣起之說焯因羅飛章之毀予謂孔子自衛反魯一定詩書之冊至漢熹平六百年有

竒已多謬失自熹平至開皇又四百年有竒自開皇至今代又五百年有竒其謬失可勝計耶又隋史旣遷其石於長安今尚有出於洛陽者何哉

鄭樵通志畧曰石經始於蔡邕秦火之後經皆初出諸家所藏傳寫或異箋傳之儒皆憑所見更不論文字之訛謬邕校書東觀奏求正定六經文字靈帝許之乃自為書而刻石於太學門外奈當漢之末祚所傳未廣而兵火無存後之人所得者亦希矣今之所

謂石經者多非蔡氏之經

洪适隸釋隸續曰石經尚書殘碑盤庚篇百七十二  
字高宗彤日篇十五字牧誓篇二十四字洪範篇百  
八字多士篇四十四字無逸篇百三字君奭篇十一  
字多方篇五字立政篇五十六字顧命篇十七字合  
五百四十七字熹平四年議郎蔡邕所書者漢儒傳  
伏生尚書有歐陽大小夏侯之學孔安國尚書漢人  
雖有為之訓傳者然不立於學官永嘉之亂三家之

書並亡故孔氏傳獨行以其書校之石本多十字少  
二十一字不同者五十五字借用者八字鴻艾勅

逸

猶之類是也通用者十一字於戲母女之類是也孔  
氏叙商三宗以年多少為先後此碑獨闕祖甲計其  
字蓋在中宗之上以傳序為次也但云高宗饗國百  
年異爾范史云蔡邕以俗儒穿鑿經籍疑誤後學與  
堂谿典馬日磾等奏求正定六經文字時博士試甲  
乙科爭第高下至有行賂改蘭臺漆書經字者靈帝

乃從諸儒之請刊石立之太學天下咸取則焉碑高一丈廣四尺陸機洛陽記云碑凡四十六書易公羊二十八碑其十二毀論語三碑其二毀禮記十五碑皆毀北齊徙之鄴都至河陽岸頽半沒於水隋復載入長安有易一卷書六卷魯詩六卷儀禮九卷春秋一卷公羊九卷論語一卷未及補治而亂作營繕者至用為柱礎唐初魏鄭公收聚之十不存一則石經之散亡久矣本朝一統時遺經斷石藏於好事之家

猶崑山片玉已不多見今京華鞠為犢園之鄉殘碑  
日益鮮矣予既集隸釋因以所有鑿之會稽蓬萊閣  
又曰石經魯詩殘碑百七十三字魏唐國風數篇  
之文也與毛詩異者如猗作兮貫作宦樞作藎數字  
又有一段二十餘字零落不成文惟有叔于田一章  
及女曰雞八字可讀其間有齊韓字蓋叙二家異同  
之說猶公羊碑所云顏氏論語碑所云蓋毛包周之  
比也漢代詩分為四在東京時毛氏詩不立學官隋



志有石經魯詩六卷此碑既論齊韓於後則知隋志  
為然也 又曰石經儀禮殘碑四十五字皆大射儀  
之文也石磨滅字畫比他經不明白靈帝紀云詔諸  
儒正五經文字刻石立於太學蔡邕傳則云奏求正  
定六經紀傳既已不同陸機洛陽記所載但有書易  
公羊禮紀論語爾雅隋志云後漢刻七經於石碑皆  
蔡邕所書其目有一字石經儀禮九卷乃漢史陸記  
之疏畧也未央宮有曲臺殿天子射宮也西京無太

學於此行禮故后倉著書說禮數萬言名曰曲臺記  
今禁中有選德殿蓋便坐觀射之地而清閒之燕谷  
訪治道率在於是殆與曲臺暗合古者射為六藝之  
一儀禮一經說射者兩篇後世非介冑之士則不習  
與古殊矣媵觚媵爵云者媵蓋送也 又曰石經儀  
禮殘碑一段八行上下皆糜碎行多者六字少者二  
字聘禮之文也前五行乃使還反命之儀後三行乃  
出聘遭喪之儀一段十行二十字士虞禮之文也漫

滅太甚僅有數字隱隱可認非板本尋繹安能得之  
因知此碑每行七十三字鴻都遺刻獨此最為難辨  
聘禮曰使者歸及郊請反命朝服載殯襮乃入陳幣  
于朝西上上賓之公幣私幣皆陳上介公幣陳他介  
皆否束帛各加其庭實皮左公南鄉鄉進使者使者  
執圭垂纁北面上介執璋屈纁立於其左反命曰以  
君命聘于某君某君受幣于某官某君再拜以享某  
君某君再拜宰自公左受玉受上介璋致命亦如之

執賄幣以告曰某君使某子賄授宰禮玉亦如之執  
禮幣以盡言賜禮公曰然而不善乎授上介幣再拜  
稽首公答再拜私幣不告君勞之再拜稽首君答再  
拜若有獻則曰某君之賜也君其以賜乎上介徒以  
公賜告如上賓之禮君勞之再拜稽首君答拜勞士  
介亦如之君使宰賜使者幣使者再拜稽首賜介介  
皆再拜稽首乃退成周之時朝覲廢而盟會講列國  
相聘結轍于道往反禮容翫曲備具靖康建炎間敵

馬南牧己酉年先公張檀請和抵雲中聽命於粘罕  
繼徙冷山十有五年然後歸紹興之季金人犯廣陵  
明年壬午仲弟往尋盟隆興之季復入淮壩其明年  
乙酉予銜命至燕館其邸十日四見其君燕射訖禮  
到闕與上介便服對內殿再拜升階奏使事賜坐飲  
茶而退既弛擔件所得之物以聞駭步就賜以所點  
一二物隨以獻得告三日蒞職如初古禮病于太煩  
今日之儀無乃太簡乎 又曰石經公羊殘碑三百

七十五字自隱公四年至桓公元年及哀公十四年  
之文也所書者皆是公羊氏傳辭而無春秋正經又  
有顏氏說石文斷續不可考繹蓋嚴顏異同之辨也  
以今板本校之惟易四字省四字爾漢注引陸機洛  
陽記云禮記碑上有馬曰碑蔡邕名今此本有堂谿  
典馬曰碑趙越下一人闕劉弘張文蘇陵傳楨八人姓名  
論語碑亦有左立孫表二人姓名陸氏所記未之詳  
也又曰石經論語殘碑九百七十有一字前四篇

後四篇之文也每篇必計其章終篇又總其字又載  
盡毛色周有無不同之說以今所行板本校之亦不  
至甚異其文有增損者其字亦有假借及用古者有  
字異而訓不遠若置其杖賈之哉者漢人作文不避  
國諱桓帝諱志順帝諱保石經皆臨文不易樊毅碑  
命守斯邦劉熊碑來臻我邦之類未嘗為高帝諱也  
此碑邦君為兩君之好何必去父母之邦尚書安定  
厥邦皆書邦作國疑漢儒所傳如此非獨遠避此諱

也水經云光和六年立石於太學其上悉刻蔡邕名  
魏正始中又刻古篆隸三字石經蓋諸儒受詔在熹  
平而碑成則光和年也隋志有一字石經七種三字  
石經三種其論云漢鑄七經皆蔡邕書又云魏立一  
字石經其說自相矛盾新舊唐志有今字石經七種  
而注論語云蔡邕作又有三字石經古篆兩種蓋唐  
史以隸為今字也觀遺經字畫之妙非蔡中郎輩不  
能為以黃初後來碑刻比之相去不啻霄壤豈魏人



筆力可到當以水經為據三體者乃魏人所刻儒林  
傳云為古文篆隸三體者非也史稱邕自書丹使工  
鐫刻今所存諸經字體各不同雖邕能分善隸兼備  
衆體但文字之多恐非一人可辦史云邕與堂谿典  
楊賜馬日磾張馴韓說單颺等正定諸經今公羊論  
語之後惟堂谿日磾二人姓名尚存別有趙陟劉弘  
張文蘇陵傳楨左立孫表數人竊意其間必有同時  
揮毫者予詳玩遺字公羊詩書儀禮又在論語上劉

寬碑陰王曜題名則公羊詩書之雁行也黃初孔廟  
碑則論語之苗裔也識者當能別之 又曰蔡伯喈  
奉熹平之詔列鴻都之碑晚學咸所取正未嘗一字  
好奇也

婁機漢隸字源曰石經漢熹平四年立在西京靈帝  
紀云詔諸儒正五經文字刻石於太學蔡邕傳云帝  
從邕與馬日磾所請正定五經文字刊石太學石高  
一丈廣四尺陸機洛陽記云碑凡四十六多毀但有

書易公羊論語而禮記盡毀不存北齊徙於鄴都半  
沒於水隋復載入長安亂作營繕者以為柱礎而隋  
志以謂後漢刻七經於石皆邕所書與紀傳所載不  
同唐魏鄭公收聚之十不存一尚書存一百三十九  
字魯詩存一百四十字儀禮存一百四十一字公羊  
存一百四十二字論語存一百四十三字

張續曰石經本末丞相洪公論載於隸釋詳矣洪公  
所未及者今麤見於此唐章懷太子引洛陽記注范

瞻漢書論石經凡四十六碑及高澄遷石經於鄴通鑑所書為五十二碑自東漢歷魏晉宋數百年間洛陽數被兵此碑當有毀者其遷於鄴乃視洛陽記多六馬疑洛陽記未詳也碑製高一丈廣四尺六經文多必非四十六碑所能盡者宋常山公河南志稱石經凡七十三碑常山公博物洽聞歐陽文忠每以古今疑事諮之河南所書必有依據矣後周代齊毀碑以為礮石方高緯昏亂兩陣勝負之頃猶需孽婦一

觀遂以其國輸後周復何有於石經則此碑之殘毀亦宜也貞觀稽古止得石經數段其傳於今者亦可知其無幾矣蔡邕本傳稱邕自書丹於碑不言為何體書今世所傳皆為隸體至儒林傳序則云為古文篆隸三體書法以相參檢注言古文謂孔氏壁中書以續考之孔壁所藏皆科斗文字孔安國當武帝之世已稱科斗書無能知者其承詔為尚書五十九篇作傳為隸古定不復從科斗古文邕獨安能具三體

書法於安國之後三百年哉漢建武時杜林避地河西得古文尚書一軸諸儒共傳寶之一軸已為世所珍如此熹平距建武又幾載乃謂六經悉能為古文非事情也或者邕以三體參校其文而書丹於碑則定為隸亦如孔安國之書傳耶儒林傳序疑字有誤者初邕正定六經與堂谿典等數人同受詔今六經字體不一當時書丹者亦不獨邕也姑識其末以俟博識君子

趙甌書史曰欲學隸者當以石經為祖

黃潛曰漢石經自北齊徙鄴隋復徙長安至唐初已  
不啻亡其什九而拓本猶存開元御府由開元迄今  
六百年石之僅存者不可知拓本之可見者如是而  
已未知後六百年其存幾何好古博雅之士所當珍  
護以謹其傳也

陶宗儀書史會要曰堂谿典官五官中郎將馬日磾  
趙陲官諫議大夫劉弘張馴韓說官議郎張丈蘇陵

傅楨楊賜孫表官郎中單賜官太史令左立官博士  
並熹平中奉詔正定諸經者

楊慎曰蔡邕石經趙殿撰家有遺字三卷

于慎行筆塵曰洛陽石經晉末未嘗損失至元魏馮  
熙常伯夫相繼為洛州刺史取之以建浮屠精舍大  
致頽落間有存者委於榛莽其後侍中崔光請遣官  
守視補其殘闕竟不能行而古迹泯矣視焚書之慘  
輕重不同其為吾道之厄一也



趙岫石墨鐫華曰漢靈帝光和六年刻石五經文於太學講堂此石經初刻也蔡邕以熹平四年與五官中郎將堂谿典議郎張馴韓說太史令單颺求正定六經文字帝許之邕乃書丹刻石立於太學門外此石經再刻也

按漢熹平刻石光和立石先後總屬中郎所書非再刻也

顧炎武金石文字記曰予兩見此本一於鄒平張氏

一於京師孫氏尚書盤庚篇三十餘字論語為政篇七十餘字堯曰篇三十餘字以視洪氏隸釋所存不過什之一而已按石經漢魏皆嘗立之熹平之立石見於後漢書靈帝紀蔡邕傳張馴傳儒林傳宦者傳正始之立石見於晉書衛恒傳而水經注則曰漢碑五經立於太學講堂前悉在東側碑上悉刻蔡邕等名魏正始中又立古篆隸三字石經魏初傳古文出邙鄆淳石經古文轉失淳法樹之於堂西石四十八

枚廣三十丈雒陽伽藍記則曰堂前有三種字石經  
二十五碑表裏刻之寫春秋尚書二部作篆科斗隸  
三種字漢右中郎將蔡邕筆之遺跡也猶有十八碑  
餘皆殘毀復有石碑四十八枚亦表裏隸書寫周易  
尚書公羊禮記四部又讚學碑一所並在堂前章懷  
太子引洛陽記則云講堂長十丈廣二丈堂前石經  
四部本碑凡四十六枚少二枚西行尚書周易公羊傳  
十六碑存十二碑毀南行禮記十五碑悉崩壞東行

論語三碑二碑毀禮記碑上有諫議大夫馬日磾議  
郎蔡邕名此皆當時親見其石而記之者也合而考  
之其不同有四焉一曰漢五六七經之不同二曰魏  
石經三體一體之不同三曰堂西所立石為漢為魏  
之不同四曰後魏所存石諸經之不同後漢書本紀  
儒林宦者傳皆云五經蔡邕張馴傳則以為六經隋  
書經籍志又以為七經此言漢五六七經之不同也  
衛恒傳言魏初傳古文者出於邯鄲淳至正始中立

三字石經轉失淳法因科斗之名更效其形水經注亦云三字石經在堂西而伽藍記以為表裏隸書隋書經籍志則謂之一字石經矣然則所謂效科斗之形而失淳法者安在耶此言魏石經三體一體之不同也伽藍記二十五碑為三種字四十八碑表裏隸書水經注謂漢經在堂東側而四十八碑為魏經在堂西乃雒陽記不言東側有碑而云堂前有四十六枚上有馬日碑蔡邕名又不言字之為三體一體無

乃并水經之所謂魏者而指之為漢與此言堂西所立石為漢為魏之不同也伽藍記云周易尚書公羊禮記四部雒陽記則多一論語而趙明誠金石錄言其家所收又有詩儀禮苟非其傳拓之本出於神龜以前則不應以宋人之所收而魏時猶未見也此言後魏所存石諸經之不同也凡此皆不可得而詳矣若夫魏書江式傳謂魏三字石經立於漢碑之西為邯鄲淳書則不攷衛恒之言而失之者也孝靜帝紀

武定四年八月遷雒陽漢魏石經於鄴北齊書文宣  
帝紀言有五十二枚視伽藍記所列東二十五西四  
十八之數僅失二十一枚耳而隋書經籍志言河陽  
岸崩遂沒於水得至鄴者不盈大半則不考北齊之  
紀而失之者也周書宣帝紀大象元年二月辛卯詔  
徙鄴城石經於雒陽隋書於劉焯傳言開皇六年運  
洛陽石經至京師而經籍志則云自鄴載入長安則  
自不考其列傳而失之者也此皆其乖誤之易見者

也又晉書裴頠傳曰轉國子祭酒奏修國學刻石寫經而水經注諸書無言晉石經者豈頠嘗為之而未成耶今此之本據宋黃長睿東觀餘論云本在雒宮前御史臺中年久摧散雒人好事者時時得之今張燾龍圖家有十版張氏壻家有五六版王晉玉家有小塊予皆得其拓本邵伯溫聞見後錄言近年雒陽張氏發地得石十數而董道廣川書跋記尚書存二百三十六字論語存三百五十七字今此石已不知



其何所歸而拓本之存於世者固往往而有也

黃虞稷曰漢石經殘碑見於洪氏隸釋者尚書僅五百四十七字視孔安國本多十字少二十一字不同者五十五字論語載盍毛包周有無不同之說公羊亦有嚴顏異同而詩則魯故所傳非毛鄭訓故此足貴也

按漢立石經蔡邕所書本一字惟因范史儒林傳云為古文篆隸三體書法以相參檢樹

之學門而楊銜之洛陽伽藍記北史劉芳傳  
因之唐竇蒙宋郭忠恕蘇望方甸歐陽棐董  
道姚寬等均仍其誤獨張綰謂邕以三體參  
檢其文而書丹於碑則定為隸其義為允載  
考衛恒及江式傳酈道元水經注皆以一字  
為漢石經迨趙明誠金石錄洪适隸釋隸續  
辨之甚詳足以徵信其載一字石經遺文後  
列堂谿典馬日碑等姓名使一字石經出於

魏當更列正始中正字諸臣姓名亦何取仍  
列典日碑等諸人於經文之後哉又史家體  
例以時代為前後隋經籍志列一字石經於  
前次魏文帝典論然後叙三字石經於後是  
一字為漢而三字屬魏不待辭說始明其曰  
魏正始中又立一字石經相承以為七經正  
字蓋雕本相沿偶謫三字為一爾今漢石經  
遺字猶有損本存者余嘗見宛平孫氏所藏

雖經文無多而八分古雅定為漢隸無疑也  
又按元吳萊立夫漢一字石經歌云先聖去  
已久世傳惟六籍後儒各專門穿鑿多變易  
蔡邕在季漢章句攷指擿八分自為書刊定  
乃勒石古碑四十六兵火空餘迹熹平歷正  
始洛土重求索衛侯師邯鄲三體精筆畫煌  
然立其西學者常嘖嘖史書竟差舛一字幾  
不覩立夫之見亦以一字為漢三字屬魏故

節錄之

經義考卷二百八十七

欽定四庫全書

經義考卷二百八十八

翰林院檢討朱彝尊撰

刊石 二

魏三字石經

隋志三字石經尚書九卷

七錄十三卷

又三字石經尚

書五卷 唐志三字石經尚書古篆三卷 隋志

三字石經春秋三卷

七錄十卷

唐志三字石經左傳

古篆十二卷

佚

郭頒魏晉世語曰黃初之後埽除太學之灰炭補舊  
石碑之缺壞

晉書衛恒傳漢武時魯恭王壞孔子宅得尚書春秋  
論語孝經時人以不復知有古文謂之科斗書漢世  
祕藏希得見之魏初傳古文者出於邯鄲淳恒祖敬  
侯觀寫淳尚書後以示淳而淳不別至正始中立三



字石經轉失淳法因科斗之名遂效其形

戴延之西征記曰國子堂前有刻碑南北行三十五版表裏書春秋經尚書二部大篆隸科斗三種字碑長八尺今有十八版存餘皆崩太學前石碑四十版亦表裏隸書尚書周易公羊傳禮記四部石質猶多崩敗魏文典論六碑四存二敗

隋志魏正始中立一字石經相承以為七經正字

按一字當屬三字之譌

江式曰魏陳留邯鄲淳特善倉雅許氏字指八體六書精究閑理以書教諸皇子又建三字石經於漢碑之西其文蔚炳三體復宣較之說文篆隸大同而古字少異

歐陽修集古錄曰古文篆隸三體遺字凡八百二十有九

歐陽棐曰高紳為湖北轉運使道中聞砧聲清遠因得此本於其覆而已斷裂矣遂載以歸完理綴輯積

藏之碑以大厯十四年七月立

趙明誠曰石本舊藏高紳學士家集古錄云紳死其子弟以石質錢於富人而富人家失火遂焚其石非也元祐間余侍親官徐州時故郎中趙竦被旨開呂梁洪挈此石隨行已斷裂用木為匣貯之竦尤珍惜親友有求墨本者必手摹以遺之竦歿今遂不知所歸

洪适隸續曰魏三體石經左傳遺字古文三百七篆

文二百十七隸書二百九十五有一字而三體不具者皇祐癸巳年洛陽蘇望氏所刻蘇君有言曰後漢熹平四年靈帝以經籍文字穿鑿疑誤後學詔諸儒讐定五經命蔡邕書古文篆隸三體鐫石立於太學今石不存本亦罕見收者近於故相王丈康家得左氏傳榻本數紙其石斷剝字多亡缺取其存者摹刻之凡八百一十九題曰石經遺字即小歐陽集古目中所有者慶厯中夏文莊公集古文四聲韻所載石

經數十字蓋有此碑所無者而碑中古文亦有韻所不收者則淪落之餘兩家所得自不同耳石經見於范史帝紀及儒林宦者傳皆曰五經蔡邕張馴傳則曰六經惟儒林傳云為古文篆隸三體書法酈氏水經注云漢立石經魏正始中又刻古文篆隸三字石經唐志有三字石經古篆兩種曰尚書曰左傳獨隋志所書異同其目有一字石經七種三字石經三種既以七經為蔡邕書矣又云魏立一字石經乃其誤

也范蔚宗時三體石經與熹平所鐫並列於學官故  
史筆誤書其事後人襲其謬錯或不見石刻無以考  
正趙氏雖以一字為中郎所書而未嘗見三體者歐  
陽氏以三體為漢碑而未嘗見一字者近世方勺作  
泊宅編載其弟旬所跋石經亦為范史隋志所惑指  
三體為漢字至公羊碑有馬日磧等名乃云魏世用  
其所正定之本因存其名可謂謬論夏氏所注古文  
既以此碑為石經又有蔡邕石經亦非也隸釋鑒漢

魏之字法詳公羊之題名據水經之事實辨二史之抵牾已定一字遺經為漢刻矣續得蘇氏此碑益喜前說猶墨守也歷古所疑於今始判會稽所鐫隸纂亦存三體數十字使來者有以取信焉

婁機曰魏三體石經左傳遺字皇祐癸巳蘇望所刻王世貞曰魏志洛陽雖經破亂而舊三字石經宛然猶存至馮熙與常伯存相繼為州廢毀分用大至頽落按魏武定四年碑移鄴都河陽岸崩遂沒於水其

得至鄴者殆不得半然則馮熙常伯存所損十之二  
三而墮水者又三四也

趙岫曰魏正始中立古篆隸三體石經古文用科斗  
鳥跡體篆用史籀李斯胡毋敬體隸用程邈體此石  
經第三刻也

按魏石經本屬三字惟典論一卷乃一字爾  
世傳經為邯鄲淳所書而晉書衛恒傳謂正  
始中立三字石經轉失淳法其非淳書明矣



趙至傳云年十四詣洛陽遊太學遇嵇康於  
學寫石經徘徊視之不能去嵇紹亦曰至入  
太學覩先君在學寫石經古文然則正始石  
經實康等所書也

晉石經

卷七

佚

晉書裴頠傳轉國子祭酒奏修國學刻石寫經

傳暢曰裴頠為國子祭酒奏立國子太學起講堂築門闕刻石寫五經

北魏石經

卷亡

後魏書孝文帝紀太和十七年九月幸太學觀石經  
崔光傳神龜元年夏光表曰詩稱蔽芾甘棠勿剪勿  
伐召伯所爰傳曰思其人猶愛其樹況用其道不恤  
其人是以前書始稽古易本山火觀於天文以察時變

觀於人文以化成天下前哲寶重墳籍珍愛分篆矧  
廼聖典鴻經炳勒金石理為國楷義成家範述實世  
模事則人軌千載之格言百王之盛烈而今焚荒污  
毀積榛棘而弗埽為鼯鼯之所棲宿童豎之所登踞  
者哉誠可痛心疾首拊膺扼腕尋石經之作起自炎  
劉繼以曹氏典論初乃三百餘載計末向二十紀矣  
昔來雖屢經戎亂猶未大崩侵如聞往者刺史臨州  
多構圖寺道俗諸用稍有發掘基蹠泥灰或出於此

皇都始遷尚可補復軍國務殷遂不存檢官私顯隱  
漸加剝撤播麥納菽秋春相因關生蒿杞時致火燎  
由是經石彌減文字增闕職忝胄教參掌經訓不能  
繕修頽墜興復生業倍深慙耻今求遣國子博士一  
人堪任幹事者專主周視驅禁田牧制其踐穢料閱  
碑牒所失次第量厥補綴詔曰此乃學者之根源不  
朽之永格垂範將來憲章之本便可一依公表光乃  
令國子博士李郁與助教韓神固劉燮等勘校石經

其殘缺者計料石功并字多少欲補之後靈太后廢  
遂寢

趙岵曰魏世宗神龜元年以王彌劉曜入洛石經殘  
毀因崔光之請補之此石經第四刻也

按北魏石經欲補治而中寢未有刻石流傳  
且神龜乃明帝年號而謂為世宗趙氏之說  
均誤故備錄魏書之文以證之

唐國子學石經

易九卷 書十三卷 詩二十卷 周禮十卷

儀禮十七卷 禮記二十卷 春秋左氏傳三十

卷 公羊傳十卷 穀梁傳十卷 論語十卷

孝經一卷 爾雅二卷

存

唐會要太和七年二月勅唐玄度覆定石經字體十  
二月勅於國子監講論堂兩廊創立石九經并孝經  
論語爾雅共一百五十九卷字樣四十卷

舊唐書鄭覃傳覃長於經學稽古守正帝尤重之覃從容奏曰經籍謬博士相沿難為改正請召宿儒與學校定六籍準後漢故事勒石於太學永代作則以正其闕從之覃奏起居郎周墀水部員外郎崔球監察御史張次宗禮部員外郎孔溫業等校定九經文字旋令上石

通鑑開成二年冬十月國子監石經成

舊唐書開成二年宰臣判國子祭酒鄭覃進石壁九

經一百六十卷時上好文覃以經義啓導遂奏置五  
經博士依漢蔡邕刊碑列於太學創立石壁九經諸  
儒校正謬譌上又令翰林勒字官唐玄度復校字體  
又乖師法故石經立後數十年名儒皆不窺之以為  
蕪累

新唐書文宗以覃名儒以宰相領祭酒請太學五經  
置博士始覃以經籍刊謬博士陋淺不能正建言願  
與鉅學鴻生共力讐刊準漢舊事鏤石太學示萬世



法詔可覃乃表周墀崔球張次宗孔溫業等是正其  
文刻於石 又曰高重為祭酒共鄭覃刊定九經於  
石

冊府元龜文宗詔國子監九經石本所司校勘尚有  
舛誤傳於永久必在精詳宜令率更令韓泉充詳定  
石經官就集賢審勘仍送國子監

王履貞太學創置石經賦曰我國家學校崇創石經  
於其中用啓千年之聖將遺萬古之風玄化式敷厥

德旣彰於有截聲詩再聞斯文庶表於無窮旣而詔  
學宛之徒命他山之役陳滿筓之文雅結峻天之遠  
碧且曰道自人弘教由時易若不考深旨勒貞石布  
落落於廣廷陳巖巖於千尺則何以表吾道之不騫  
見伊唐之有赫者哉由是雕鏤之功備矣文質之義  
昭然鑒寒光而嶄嶄迭映駢古色而字字相宣儼彼  
貞規韞玉之姿益壯窮諸墨妙崩雲之勢彌堅事旣  
叶於造微理乃符於撫實削成豈勞於執簡壁立更

逾於散帙旁分鳥跡且非精衛之銜來遠映天光有  
若媧皇之補出可謂洙泗之風不墜而教化之道益  
敦鑽仰苟同於深奧咫尺可見於微言五色參差夫  
子之文章盡在丹楹俯矚聖人之閭闕斯存豈非吾  
君秉茲一德修文立極堅貞為庶士之規考禮作百王  
之式既而辨舛錯而定魯魚然後二三子是效是則  
黎持記曰汲郡呂公龍圖領漕陝右之日持適承乏  
雍學一日謁公公喟然謂持曰京兆關閭間有唐國

子監存焉其間石經乃開成中鐫刻唐史載文宗時  
太學勒石經而鄭覃與周墀等校定九經文字上石  
及覃以宰相兼祭酒於是進石壁九經一百六十卷  
即今之石經是已舊在務本坊自天祐中韓建築新  
城而六經石本委棄於野至朱梁時劉鄩守長安有  
幕吏尹玉羽者白鄩請輦入城鄩方備岐軍之侵軼  
謂此非急務玉羽給之曰一旦敵兵臨城碎為矢石  
亦足以助賊為虐鄩然之乃遷置於此即唐尚書省

之西隅也地雜民居其處窪下霖潦衝注隨立輒仆  
埋沒腐壞歲久折缺殆非所以尊經而重道予欲徙  
置於府學之北牖子且倂圖來視厥既視圖則命徒  
役具器用平其溝塹而基之築其浮虛而實之凡石  
刻之偃者仆者悉輦置於其地洗剔塵土補錮殘缺  
分為東西次比而陳列焉明皇注孝經及建學碑則  
立之於中央顏褚歐陽徐柳之書下迨偏旁字源之  
類則分布於庭之左右俄而如登道山如入東序河

圖洛書大壁琬琰爛然在目而應接或不暇矣先是  
有興平僧誕妄惑衆取索無厭大尹劉公希道沒入  
其貲有欲請於朝以備慈恩浮屠者公即建言崇飾  
塏廟非古而興建學校為急朝廷乃以五百千畀之  
不費於公不役於民經始於元祐二年初秋盡孟冬  
而落成門序旁啓雙亭中峙廊廡回環不崇不庳誠  
故都之壯觀翰墨之淵藪也學者暇日於此游息得  
之於目而會之以心固已有超然遠詣之意豈曰小

補之哉竊惟六經天人之道備聖人所以遺天下來  
世之意盡在於是自周末至隋千餘載之間已遭五  
危汗簡以載或焚或脫縑楮魚蠹易腐易裂道雖無  
窮而器則有敝惟鑱之金石庶可以久有唐之君相  
知物之終始而憂後世之慮深故石經之立殆以此  
也然以洛陽蔡邕石經四十六碑觀之其始立也觀  
視摹寫者車乘日千餘兩填塞街陌可謂盛矣及范  
蔚宗所見其存者纔十有二枚餘皆毀壞磨滅然後

知不得其人以護持雖金石之固亦難必其可久此  
呂公所以為有功於聖人之經而不可不書也然持  
書此者豈特紀其歲月而已哉將使後之君子知古  
人之用心而不廢前功庶斯文之有寄云爾元祐五  
年九月

按是記在石經之側碑為宋安民所鐫不肯  
刻黨人姓氏者也沒郡呂公者大忠也尹王  
羽京兆長安人以孝行聞劉鄩辟為保大軍



節度推官仕後唐至光祿少卿

周必大曰唐文宗在御儲精經籍有意復古而緇素  
謬盭時惟鄭覃體上之意憫道之衰慨然有請於朝  
願與鉅學鴻儒協力讐校準漢舊事鏤石太學帝欣  
然可之於是周墀崔球張次宗孔溫業等咸預其選  
羣經是正視漢熹平益無愧焉

李應祥曰雍石經唐文宗詔刻國子監鄭覃以經籍  
刊繆建言願與鉅學鴻生共力讐校準漢舊事鏤石

太學乃表周墀崔球張次宗孔溫業等正其文太和七年勅唐玄度覆定石經字體於國子監講論堂兩廊創立石九經并孝經論語爾雅共一百五十九卷字樣四十卷開成二年告成今在文廟碑洞中即其刻也

趙岵曰唐天寶中刻九經於長安禮記以月令為首從李林甫之請此石經第五刻也文宗時鄭覃以經籍利繆建言讐刊準漢故事太和七年勅唐玄度覆

定石經字體於國子監立石九經并論語孝經爾雅  
共一百五十九卷字樣四十卷開成二年告成此石  
經第六刻也 又曰今西安府學石經乃唐文宗時  
所勒舊在務本坊韓建築新城棄之於野朱梁時劉  
鄩用尹玉羽之請遷故唐尚書省之西隅宋元祐中  
汲郡呂公始遷今學嘉靖乙卯地震石經倒損西安  
府學生員王堯惠等按舊文集其闕字別刻小字立  
於碑旁以便摹補按唐書謂文宗朝石經違棄師法

不足觀然其用筆雖出衆人不離歐虞褚薛法要非  
今人所及惟王堯惠等補字大為紕謬今華州東生  
文豸家有乙卯以前搨本庶幾稱善焉

顧炎武曰九經并孝經論語爾雅字樣等都計六十

五萬二百五十二字

易二萬四千四百三十七字書二萬七千一百三十四字詩四

萬八百四十八字周禮四萬九千五百一十六字儀禮五萬七千一百一十一字禮記九萬八千九百九

十四字春秋左氏傳一十九萬八千九百四十五字公羊傳四萬四千七百四十八字穀梁傳四萬二千

八十九字孝經二千四百三十三字論語一千九百一十一字今在西

萬六千五百九十字爾雅一萬七千九百九十一字

安府學其末有年月一行題名十行曰開成二年丁  
巳歲月次於亥日維丁亥書石學生前四門館明經  
臣艾居晦書石學生前四門館明經臣陳玠書石學  
生前文學館明經臣

闕

書石官將仕郎守潤

州句容縣尉臣段絳校勘兼看書上石官將仕郎守  
祕書省正字臣柏嵩校勘兼看書上石官將仕郎守  
四門助教臣陳壯士覆定字體官翰林待詔朝議郎  
權知汴王友上柱國賜緋魚袋臣唐玄度校勘官兼

專知都勘定經書檢校刊勒上石朝議郎守國子毛  
詩博士上柱國臣章師道朝散大夫守國子司業騎  
都尉賜緋魚袋臣楊敬之都檢校官銀青光祿大夫  
右僕射兼門下侍郎國子祭酒同中書門下平章事  
太清宮使監修國史上柱國滎陽郡開國公食邑二  
千戶臣覃按舊唐書開成元年正月中書門下奏起  
居舍人集賢殿學士周墀監察御史張次宗禮部員  
外郎孔溫業兵部員外郎集賢殿直學士崔球等同

勅校經典釋文又云令率更令韓泉充詳定石經官  
新唐書亦列墀等四人而碑並不載又曰舊唐書  
謂石壁九經字乖師法名儒皆不窺之愚初讀而疑  
焉又見新書無貶辭以為石壁九經雖不逮古文亦  
何遽不賢於寺碑冢碣及得其本而詳校之乃知經  
中之繆戾非一而劉昫之言不誣也如周易君子以  
裒多益寡裒誤裒悔吝者言乎其小疵也言誤存其孰  
能與于此哉脫于字周易繫辭下第八脫下字易窮

則變變則通通則久是以自天祐之吉元不利下多也字力小而任重小誤少傷于外者必反其家其誤于決必有所遇脫所字疊則飭也飭誤飾豐多故親寡旅也故下多也字姤遇也姤誤遺其與今文不同而兩通者終來有他吉他作它剛健篤實輝光輝作輝君子以治歷明時歷作歷可與佑神矣佑作祐其受命也如嚮嚮作響無三才而兩之三才之道也才皆作材其一字而前後不同者包蒙包荒包承包羞



繫于包桑

繫辭下同

包皆作苞包有魚包无魚以杞包瓜

包皆作包問以辨之由辨之不早辨也其辨明也明  
辨哲也辨吉凶者存乎辭困德之辨也井以辨義辨  
是與非辨皆作辯君子以類族辨物剝床以辨君子  
以慎辨物居方復小而辨于物辨皆作辨其旁注者  
至靜而德方德下添也字貢亨小利有攸往利下添  
貞字其先誤而後改者略例筌誤筌愈誤喻二无誤  
無皆即其誤改之其標題周易繫辭上第七周易繫

辭第八周易說卦第九皆八分書而周易序卦第十周易雜卦第十一皆正書雖依古注本附於第九之內以正書為別終似未安尚書乃祖乃父丕乃告我高后曰作丕刑於朕孫乃父誤先父孫上多子字臣下罔攸稟令令誤命若藥弗瞑眩藥誤樂王乃徇師而誓徇誤循乃汝世讐世誤誓太保乃以庶殷攻位於洛汭攻誤公用端命于上帝于誤予其與今文不同而兩通者敢對揚天子之休命無之字其旁注者

予有亂臣十人臣字旁注惟婦言是用是字旁注釋  
箕子囚封比干墓式商容間干下容下各添之字  
詩昔育恐育鞠誤鞠小戎序國人則矜其車甲甲  
誤田舒懷受兮懷誤憂予尾脩脩誤修戎車既飭  
飭誤飾鞠為茂草鞠誤鞠以祈黃耆祈誤祁涼曰不  
可涼誤諒鞠哉庶正鞠人忮忒鞠皆誤作鞠無此疆  
爾界界誤介侯疆侯以疆誤疆其與今文不同而兩  
通者雖雖鳴雁雖作雍之死矢靡他他作它不知我

者謂我士也驕作不我知

二章同

和鸞雖雖雖作雍何

人斯序故蘇公作是詩以絕之也以作而維塵雖今  
雖作雍既匡既勅作勅其政不獲政從鄭箋作正  
尚不愧于屋漏愧作媿于彼西雖肅雖和鳴有來雖  
雖雖皆作雍屢豐年屢作婁其旁注者女雖湛樂從  
樂下添克字自今以始歲其有下添年字曰商是常  
商下添王字其先誤而後改者抱衾與裯裯誤稠不  
瑕有害瑕誤遐鱸鮪發發發誤撥噉沓背憎噉誤蹲

如彼遡風遡誤愬駟牡馬牡誤牧皆即其誤改之  
云何其盱脫其字添周禮女史八人史誤使大宰三  
曰郊甸之賦郊誤邦內饗豕盲視而交睫豕誤施典  
臬掌布總縷紵之麻草之物總誤絲牛人軍事共其  
犒誤槁司市市司帥賈師而從賈誤胥肆長掌其戒  
令令誤禁鞮鞻氏府一人一誤八閭人禁門用瓢齋  
用誤明司几筵設莞筵紛純筵設席大司樂大磬磬  
誤磬王大食三侑侑誤宥大師令奏鼓輦鼓誤瞽大

祝四曰禋禋誤禋司常家各象其號象誤相凡以神  
仕者仕誤士小子史二人二誤一大司馬旗居卒閒  
居誤車考工記舛胡之筭筭誤筭矢人前弱則俛俛  
誤勉其與今文不同而兩通者醫師疔瘍者疔上多  
有字野廬氏有相翔者誅之誅上多則字邦之大師  
大上多有字庭氏以救日之弓與救月之矢射之射  
上多夜字儀禮士冠禮捷柶興捷誤建鄉射禮司射  
適堂西袒決袒誤袒褊髮橫而奉之奉誤拳大夫與

士射袒纁襦纁誤薰燕禮右祭脯醢脯誤脯大射儀  
賓升成拜拜誤敗坐授瑟乃降授誤受聘禮賓既將  
公事復見訝以其摯訝誤之公食大夫禮陳鼎於碑  
南南面西上脫一南字覲禮天子賜舍曰伯父脫曰  
字上喪禮祭服不倒倒誤到少牢饋食禮如筮日之  
儀儀誤禮主婦被錫衣侈袂侈誤移下同祝延尸延誤  
筵有司徹二手執挑匕枋挑誤挑主婦洗爵於房中  
脫爵字主婦北面答拜受爵尸降筵受主婦爵以降

誤作受尸爵主人降洗爵爵誤解

下主人實爵並同

主人拜

受爵尸拜送脫爵字其與今文不同而兩通者鄉射禮適左个中亦如之亦作皆燕禮小臣又請媵爵者二大夫媵爵如初大夫下更有大夫二字禮記御刪定月令在曲禮之前月令人乃遷徙徙誤徒其器宏以奄奄誤掩檀弓上周公蓋祔祔誤附王制示弗故生也示誤亦禮器響帝于郊而風雨節寒暑時脫節字學記燕辟廢其學辟誤譬喪大記男子出寢門外



脫外字子大夫公子衆士食粥脫衆士二字祭義父  
母愛之喜而勿忘喜誤嘉哀公問如此則國家順矣  
脫則字坊記民猶薄於孝而厚於慈猶下多有字中  
庸待其人而後行而誤然君子之所不可及者脫之  
字緇衣有國家者章義渾惡脫家字儒行慎靜而尚  
寬脫而字大學人之其所親愛而辟焉五辟字皆誤  
作譬若有一个臣个誤介其與今文不同而兩通者  
檀弓上有亡惡乎齊亡作無歲壹漆之壹作一樂記

非聽其鏗鏘而已也鏘作鎗雜記上客立于門西于  
作於雜記下泄柳之母死泄作世喪大記命婦汜拜  
衆賓於堂上於作于主人先俟于門外于作於中庸  
可一言而盡也一作壹問喪祭之宗廟以鬼享之享  
作饗大學堯舜帥天下以仁二帥字皆作率昏義祖  
廟既毀教于宗室于作於射義是以諸侯君臣以作  
故其先誤而後改者學記教人不盡其材材誤才故  
人不耐無樂耐誤能皆即其誤改之春秋左傳隱元

年且告之悔且誤具五年僖伯稱疾不從疾誤侯十年伐戴戴誤載桓二年故封桓叔于曲沃故誤政六年楚之羸羸誤羸以類命為象類誤德閔二年從曰撫軍軍誤國僖三年公子友如齊涖盟涖誤泣四年歸胙于公脫胙字姬真諸宮六日宮誤公公殺其傳杜原欸傳誤傳七年弗可改也已改誤故十四年公怒止之止誤上十五年輅秦伯輅誤轄使卻乞告瑕呂飴甥且召之且誤國二十五年昏而傳焉傳誤傳

二十七年責無禮也責誤青卻穀可穀誤穀三十一年晉新得諸侯新誤親東傳于濟傳誤傳三十三年入險而脫入誤人為從者之淹淹誤流文元年王使毛伯衛來錫公命錫誤賜亨江芊芊誤芊二年廢六關關誤闕七年寘丈公子焉焉誤曰十二年太子以夫鍾與邲邲來奔邲誤封宣二年晉趙盾殺其君夷臯弒誤殺三年晉侯伐鄭及邲邲誤延商紂暴虐紂誤討四年秋公如齊秋誤利六年離卦誤畫作同人

八年殺諸絳市絳誤終十二年晉師在教郤之間師  
誤帥十五年吾獲狄土土誤士十七年盟于卷楚卷  
誤巷郤子其或者欲已亂于齊乎乎誤平十八年凡  
自虐其君曰弑虐上多內字成二年及齊師戰于新  
築師誤侯且辟左右且誤旦七年尋蟲牢之盟蟲誤  
蠱十七年楚公子橐師襲舒庸橐誤素襄十年子蟜  
曰蟜誤矯今伐其師今誤令十四年士鞅反反誤及  
十七年荀過華臣之門必騁騁誤聘十九年而視不

可含含誤舍所不嗣事于齊者事誤是天子令德天  
誤夫二十一年樂盈過于周過上多奔楚二字二十  
三年邾畀我來奔畀誤卑二十五年先夫當之矣夫  
誤天井堙木刊堙誤煙賊車兵徒卒甲楯之數卒誤  
兵二十七年父子死余矣余誤餘免餘復功審氏餘  
誤余二十八年重邱之盟未可忘也忘誤志使析歸  
父告晏平仲晏誤宴文子使召之召誤君慶氏之馬  
善驚馬誤焉武王有亂臣十人脫臣字三十年蔡景

侯為太子般娶于楚娶誤聚單公子愆期期誤旗駟  
帶追之駟誤四昭元年今武猶是心也今誤令二年  
齊使上大夫送之送誤逆三年少姜有寵而死姜誤齊  
知而復從復誤弗四年恃險與馬馬誤焉五年娶于  
子尾氏娶誤聚君若驩焉好逆使臣若誤苦九年無  
圉猶可圉誤宥十三年隱太子之子廬歸于蔡廬誤  
廬十四年楚子使然丹簡上國之兵于宗邱宗誤宋  
二十年余不忍其詢詢誤詢取人于萑苻之澤苻誤苻

二十一年心是以感感實生疾感誤咸二十二年士  
平出奔楚士誤氏邊印為大司徒印誤印二十五年  
季公鳥生申申誤甲二十七年入于握室堀誤握定  
元年榮駕鸞駕誤駕三年及邾子盟于拔拔誤拔八  
年子姑使溷代子代誤伐十年駟赤謂侯犯曰赤誤  
亦哀四年盜殺蔡侯申殺誤弑蔡昭侯將如吳蔡誤  
葬十六年與晉人謀襲鄭晉誤為二十三年有不腆  
先人之產馬馬誤馬二十六年四方其訓之訓誤順



其與今文不同而兩通者宣二年以視諸朝視作示  
哀十六年比事克則為卿事下有也字其續添者昭  
二十二年辛丑伐京毀其西南下添子朝奔郊四字  
春秋公羊傳隱元年何以名字也名上多不字二年  
婦人謂嫁曰歸嫁誤嫁三年曷為或言崩或言薨脫  
上或字生母相見死母相哭母字並誤作母死母誤  
作母死六年吾與鄭人末有成也末誤未下十年宋  
人蔡人衛人伐載載誤戴桓二年曰有有則此何以

書脫一有字隱賢而桓賊也賊誤賤莊十九年此其  
言遂何脫其字二十五年求乎陰之道也陰誤隱三  
十二年狄伐邢邢誤刑僖四年南夷與北狄交誤作  
北夷六年此其言圍何圍下多一者字二十六年乞  
師者何脫師字三十年歸惡乎元咄也乎誤于三十  
三年百里子與蹇叔子百誤伯文四年其謂之逆婦  
姜于齊何何誤河宣十五年然後歸爾爾誤耳成十  
五年成公幼幼誤憂臧宣叔者相也叔誤公襄十四

年邾婁人于戚脫人字十七年春王二月二誤三十  
九年為其驕蹇為誤或二十九年許人子者必使子  
也人下脫子字昭九年其言陳火何脫陳字定元年  
立煬宮宮誤公四年夷狄也而憂中國而誤其哀四  
年盜殺蔡侯申殺誤弑六年齊國夏及高張來奔高  
上多齊字十四年顏淵死子曰子上多孔字其與今  
文不同而兩通者隱四年隱公曰否作隱曰吾否桓  
六年簡車徒也徒作馬淫乎蔡乎作于十一年祭仲

者何鄭相也相上有之字文六年何以謂之天無是月非常月也是月下更有是月二字宣六年此非弒君而何而作如十年未絕於我也於作于十二年是以君子篤於禮而薄於利下於作于成二年得一貶焉爾一作壹襄十二年春王正月正作三二十九年爾殺吾君殺作弒三十一年於是負孝公之周愬天子愬作訴十四年有麇而角者麇作麇其先誤而後改者桓二年此其目言之何目誤作月閔元年蓋弒

之矣使弑子般弑並誤殺僖十三年葬陳宣公宣誤桓成二年及齊侯戰于鞏侯誤師昭二十五年慶子免君子大難矣脫矣字皆即其誤改之春秋穀梁傳隱元年父者何傳也傳誤傳四年弑而代之也代誤伐九年所俠也俠誤挾莊七年則是兩說也兩誤兩同僖五年天子世子世天下也誤作士子二十二年春秋三十有四戰脫有字二十八年晉侯齊師宋師秦師誤作齊侯文二年內大夫可以會外諸侯脫外

字三年王子虎卒誤作壬子宣八年以譏乎宣也譏

誤饑襄元年晉侯使荀瑩來聘瑩誤嬰

二年三年同

三年

諸侯始失正矣正誤王六年立異姓以涖祭祀立上

多非字哀元年此該之變而道之也該誤郊六年入

者內弗受也弗誤不

下同

其與今文不同而兩通者僖

十七年桓公常有存亡繼絕之功脫公字文六年處

父主境上事事上多之字成五年帥群臣而哭之前

作率後作帥其先誤而後改者甚多不具載論語賜

也爾愛其羊爾誤女不知其仁仁誤人子使漆雕開  
仕雕誤彫再斯可矣斯誤思三人行三上多我字必  
有我師焉有誤得冉有子貢侃侃如也有誤子告夫  
三子三上多一二字可與言而不與之言脫之字無  
求生以害仁仁誤人吾猶及史之闕文也脫之字稱  
諸異邦曰寡小君諸誤謂何德之衰衰下多也字其  
與今文不同而兩通者女得人焉爾乎爾作耳人潔  
己以進潔作絜其先脫而後添注者陽貨篇子曰巧

言令色鮮矣仁爾雅替戾底廢誤作底底翻藤也翻  
誤翮皇華也誤華皇赫兮咺兮咺誤烜是刈是穫獲  
誤穫木謂之虞木誤本何鼓謂之牽牛何誤河澤鳥  
壤壤誤飡芋麻母芋誤芋穫橐含穫誤攬柷州木柷  
誤祝魚尾謂之丙尾上添之字燕白脰鳥鳥誤鳥楊  
鳥白鴈楊鳥誤鴈鳶鳥醜鳥鳥鵲醜鳥誤鳥麇  
大麇誤作大麇凡經中二十字皆作廿三十字皆作  
卅經中凡虎字皆缺末筆作虎虢號號鬻鬻虢虢字



皆同避太祖諱也淵字皆缺筆作淵嫻亦作嫻避高祖諱也世字皆缺筆作世泄作洩紕作綫棄作弃勣作勣葉作葉漆捺黠諫諫僚皆改從云民字皆缺筆作巳岷作毗岷作岷岷作岷岷皆改從氏避太宗諱也亨皆從亨避肅宗諱也豫字皆缺筆作豫避代宗諱也适字皆缺筆作适避德宗諱也誦字皆缺筆作誦避順宗諱也純字皆缺筆作純避憲宗諱也恒字皆缺筆作恒避穆宗諱也湛字皆缺筆

作湛甚作甚甚作堪避敬宗諱也乃若高宗諱治中宗  
諱顯睿宗諱旦宗諱隆基文宗諱涵皆不缺筆者  
禮天子事七廟自肅至敬七宗而高祖太廟創業之  
君不祧者也宗以上則祧廟也故不諱文宗則今  
上也古者卒哭乃諱故生不諱經中左傳文公宣公  
卷字更濫惡而成城字皆缺末筆穀梁襄昭定哀四  
公卷儀禮士昏禮皆然此為朱梁所補刻考之宋劉  
從乂黎持二記但言韓建劉鄩移石而不言補刻然

成字缺筆其為梁諱無疑昔人固未嘗遍讀而博考也

經義考卷二百八十八

欽定四庫全書

經義考卷二百八十九

翰林院檢討朱彝尊撰

刊石

三

後蜀石經

易十卷

畧例一卷

書十三卷

詩二十卷

周禮十

二卷

儀禮十七卷

禮記二十卷

春秋左氏

傳三十卷

公羊傳十二卷

穀梁傳十二卷

論語十卷 孝經一卷 爾雅三卷

俱佚

呂陶曰五代之亂疆宇割裂孟氏有劍南百度草創  
猶能取易書詩春秋禮記周禮刻於石以資學者國  
朝皇祐中樞密直學士京兆田公加意文治附以儀  
禮公羊穀梁傳所謂九經者備焉

張俞曰唐之衰侯王怙亂崩裂區宇濫削典法惟孟  
氏踵有蜀漢以文為事凡草創制度多襲唐軌紹漢

學遂勒石書九經

席益記畧曰蜀儒文章冠天下其學校之盛漢稱石室禮殿近世則石壁九經今皆存焉自孝景帝時太守文翁始作石室至東漢興平元年太守高朕作周公禮殿於石室東圖畫邃古以來君臣聖賢然亦有魏晉名流以故世傳西晉太康中刺史張收始畫非也殿有畫自高朕始收殆嘗增易之今壁間又有東晉人士蓋收之後繼有畫者不知誰氏也齊永明十

年刺史劉浚益以禮家器服制度偽蜀廣政七年其相母昭裔按雍都舊本九經命平泉令張德釗書而刻諸石本朝因禮殿以祀孔子為宮其旁置學官弟子講習傳授故蜀帥尚書右丞胡公宗愈作堂於殿之東南隅以貯石經蓋自東漢興平元年歲在甲戌始作禮殿逮我宋紹興六年丙辰歷年六百七十有三其間偽蜀刻石經之歲是為晉開運甲辰至是一百九十有三年矣



洪邁曰孟昶時所刻石本九經其書淵世民字皆缺  
畫猶避唐諱

雷叔聞曰偽蜀廣政七年其相母丘裔按雍都舊本  
九經命平泉令張德釗書而刻諸石是歲實晉開運  
甲辰也蜀守胡宗愈作堂以貯石經席益增葺為記  
晁公武曰石經周易并畧例十一卷

曾宏父石刻鋪  
叙作十二卷又

畧例  
一卷

偽蜀廣政辛亥孫逢吉書廣政孟昶年號也說

卦乾健也以下有韓康伯註畧例有邢璣註此與國

子監本不同者也。以蜀中印本校邢璣註畧例不同者，入百餘字，詳其意義，似石經誤而無他本訂正姑兩存焉。尚書十三卷，偽蜀周德貞書經文有祥字，皆缺其畫，亦缺民字之類。蓋孟氏未叛唐時所刊也。以監本校之，禹貢雲土夢作入，倒土夢字盤庚若網在網，皆作網字。按沈括筆談云：雲土夢作入，太宗時得古本，因改正以網為網，未知孰是。毛詩二十卷，偽蜀張紹文書與禮記同時刊。石周禮十二卷，偽蜀孫朋

吉書以監本是正其註或羨或脫或不同至千數禮  
記二十卷偽蜀張紹文書不載年月經文不缺唐諱  
當是孟知祥僭位之後也首之以月令題云御刪定  
蓋明皇也林甫等註蓋李林甫也其餘篇第仍舊議  
者謂經禮三百曲禮三千毋不敬一言足以蔽之故  
先儒以為首孝明肆情變亂甚無謂也左氏傳三十  
卷不題所書人姓名亦無年月按文不缺唐諱及國  
朝諱而缺祥字當是孟知祥僭位後刊石也公羊傳

十二卷皇朝田況皇祐初知成都日刊石國史藝文志云偽蜀刻五經備註傳為世所稱以此言觀之不應無公穀豈初有之後散毀耶穀梁傳十二卷其後不載年月及所書人姓氏按文不缺唐及偽蜀諱而缺恒字以故知刊石當在真宗以後意者是田況乎論語十卷偽蜀張德釗書缺唐諱立石當在孟知祥未叛之前其文脫兩字誤一字又述而第七舉一隅下有而示之三字三人行必有我師焉上又有我字衛

靈公第十五敬其事而後其食作後食其祿與李鶚  
本不同者此也 又曰鴻都石經自遷徙鄴雍遂茫  
昧於人間唐太和中復刻十二經立石國學後唐長  
興中詔國子博士田敏與其僚校諸經鏤之板故今  
世太學之傳獨此二本爾按趙清獻公成都記偽  
蜀相母昭裔捐俸取九經琢石於學宮而或又云母  
丘裔依太和舊本令張德釗書皇祐中田元均補刻  
公羊穀梁二傳然後十二經始全至宣和間席升獻

又刻孟子參馬今考之偽相實母昭裔也孝經論語  
爾雅廣政甲辰歲張德釗書周易辛亥歲楊鈞孫逢  
吉書尚書周德貞書周禮孫朋吉書毛詩禮記儀禮  
張紹文書左氏傳不誌何人書而祥字缺其畫亦必  
爲蜀人所書然則蜀人立石蓋十經其書者不獨德  
釗而能盡用太和本固已可嘉凡歷八年其石千數  
昭裔獨辨之尤偉然也公武異時守三營嘗對國子  
監所摸長興板本讀之其差誤蓋多矣昔議者謂太

和石本授寫非精時人弗之許而世以長興板本為便國初遂頒布天下收向日民間寫本不用然有舛誤無由參校判知其謬猶以為官既刊定難以獨改由是而觀石經固脫錯而監本亦難盡從公武至少城寒暑一再易節暇日因命學官讐校之石本周易說卦乾健也以下有韓康伯注畧例有邢璣注禮記月令從唐李林甫改定者監本皆不取外周易經文不同者五科尚書十科毛詩四十七科周禮四十二

科儀禮三十一科禮記三十二科春秋左氏傳四十

六科公羊傳三十一科

石刻鋪叙作二十二

穀梁傳一十三科

石刻鋪叙作二十三

孝經四科論語八科爾雅五科孟子二十

七科其傳注不同者尤多不可勝紀獨計經文猶三

百二科迹其文理雖石本多誤然如尚書禹貢篇夢

土作乂毛詩日月篇以至困窮而作是詩也左氏傳

昭公十七年六物之占在宋衛陳鄭乎論語述而篇

舉一隅而示之衛靈公篇敬其事而後食其祿之類



未知孰是先儒有改尚書無頗為無陂改春秋郭公  
為郭亡者世皆譏之此不敢決之以臆姑兩存焉亦  
鐫諸樂石附於經後將必有考而正之者

趙希弁曰石經周易十卷經注六萬六千八百四十

四字

石刻鋪叙經二萬四千五十二  
字注四萬二千七百九十二字

將仕郎守國子

助教臣楊鈞朝議郎守國子毛詩博士柱國臣孫逢

吉書尚書十三卷經注并序八萬一千九百四十四

字

石刻鋪叙經二萬六千二百八十六字注四萬八  
千九百八十二字共七萬五千二百六十八字

將仕郎試祕書郎臣周德貞書鑄玉冊官陳德超鑄

毛詩二十卷經注一十四萬六千七百四十字

石刻鋪叙

經四萬一千二十一字注十萬五千七百一十九字共十四萬六千八百一十二字

將仕郎試

祕書省校書郎張紹文書周禮十二卷經注一十六

萬三千一百三字

石刻鋪叙經五萬五百八十字注十一萬二千五百九十五字

將

仕郎試祕書省校書郎孫朋吉書儀禮十七卷經注

一十六萬五百七十三字

石刻鋪叙經五萬二千八百一十二字注七萬七千八百

九十一字共十三萬六千九百九十三字

將仕郎試祕書省校書郎張紹文

書禮記二十卷經注一十九萬六千七百五十一字

石刻鋪叙經九萬八千五百四十五字注十萬六千四十九字共二十萬四千五百九十四字 卷首

題曰御刪定禮記月令第一集賢院學士尚書左僕

射兼右相吏部尚書修國史上柱國晉國公臣林甫

奉勅注曲禮為第二蓋唐明皇刪定之本也將仕郎

試祕書省校書郎張紹文書春秋經傳集解三十卷

經注并序三十四萬五千八百四十四字

石刻鋪叙序一千六

百一十七字經傳十九萬七千二百六十五字注四萬六千九百六十二字共二十四萬五千八百四十

四 不題所書人姓氏公羊傳十二卷經注一十三萬

字 一千五百一十四字

石刻鋪叙傳四萬四千七百三十八字注七萬七千三十七字

共十二萬一千七百七十五字

不題所書人姓氏穀梁傳十二卷經

注八萬一千六百二十字

石刻鋪叙傳四萬一千八百九十字注三萬九千七

百三十字

不題所書人姓氏論語十卷經注并序三萬五

千三百六十八字

石刻鋪叙序三百七十二字經一萬五千九百十三字注一萬九千

四百五十四字共三萬五千七百三十九字

將仕郎前守簡州平泉縣令

兼殿中侍御史賜緋魚袋張德釗書潁川郡陳德謙

鐫字孝經一卷

石刻鋪叙作二卷

經注并序四千九百八十

五字

石刻鋪叙序四百三十九字經一千七百九十八字注二千七百四十八字

不題所

書人姓氏

石刻鋪叙簡州平泉令張德釗書

但題潁川郡陳德謙鐫

字爾雅三卷

石刻鋪叙作二卷

將仕郎前守簡州平泉縣令

賜緋魚袋張德釗書武令昇鐫不題經注字數若干

以上石室十三經蓋孟昶時所鐫故周易後書廣政

十四年歲次辛亥五月二十日惟三傳至皇祐初方

畢故公羊傳後書大宋皇祐元年歲次己丑九月辛

卯朔十五日乙巳工畢又書將仕郎試國子四門助教州學講說何維翰將仕郎試祕書省校書郎州學說書黃東儒林郎試祕書省校書郎守華陽縣尉州學勾當王尚喆朝奉郎祕書省著作佐郎簽署節度判官廳公事武騎尉管勾州學華參奉直郎尚書屯田員外郎通判軍州兼管內橋道勸農事及提舉渠堰騎都尉借緋提舉州學解程朝奉郎尚書屯田員外郎通判軍州兼管內勸農事及提舉渠堰輕車都

尉借緋提舉州學聶世卿提點益州路諸州軍刑獄  
兼本路勸農提舉渠堰公事朝奉郎尚書比部員外  
郎護軍借紫孫長卿益州路諸州水陸計度轉運使  
兼本路勸農使朝奉郎尚書刑部員外郎直史館上  
騎都尉賜緋魚袋借紫曹頴叔樞密直學士朝散大  
夫右諫議大夫知益州軍州事兼管內橋道勸農使  
充益利路屯駐泊本城兵馬鈐轄提舉益利路諸  
州軍兵甲巡檢賊盜公事上騎都尉京兆郡開國侯

食邑一千戶賜紫金魚袋田況

曾宏父曰古文尚書三冊三卷蓋唐天寶末廢古書  
前傳本中汲郡呂大防得之宋次道王仲至家乃元  
豐五年壬戌鏤板乾道六年庚寅帥晁公武取以入  
石教官張大固等監刊又曰益郡石經肇於孟蜀  
廣政悉選士大夫善書者模丹入石七年甲辰孝經  
論語爾雅先成時晉出帝改元開運至十四年辛亥  
周易繼之實周太祖廣順元年詩書三禮不書歲月



逮春秋三傳則皇祐元年九月訖工時我宋有天下  
已九十九年矣通蜀廣政元年肇始之日凡一百一  
十二禩成之若是其艱又七十五年宣和五年癸卯  
益帥席貢始奏鐫孟子運判彭慥繼其成凡十卷乾道  
六年庚寅晁公武又鐫古文尚書暨諸經考略洪文  
敏公邁謂孟蜀所鐫字體清謹有貞觀遺風續補經  
傳殊不逮前且引魏徵虞世南相繼為祕書監日請  
選五品以上子孫工書者為書手蓋欲字畫清婉可

以傳久是以自經傳以後非士夫所書皆不著姓氏  
若漢石經今不易得好古者所藏僅十數頁蜀中又  
以翻刻入石黃長睿謂開元中藏拓本於御府以開  
元二字小印印之是玄宗時已罕得況今又六百年  
後耶

王應麟曰偽蜀相母昭裔取唐太和本琢石於成都  
學官與後唐板本不無小異乾道中晁公武參校二  
本取經文不同者三百二科著石經考異亦刻於石

張奐又校注文同異為石經注文考異四十卷 又  
曰成都石經孟蜀所刻於唐高祖太宗之諱皆缺畫  
唐之澤深矣

陶宗儀曰張德釗孫逢吉張紹文周德貞孫朋吉五  
人皆善書後蜀廣政七年被選以右僕射母昭裔所  
校勘定孝經論語爾雅毛詩尚書儀禮禮記周禮模  
丹入石鐫置益部德釗簡州平泉令逢吉國子毛詩  
博士紹文德貞朋吉俱祕書省祕書郎

楊慎曰五代僭偽諸君惟吳蜀二主有文學然李昇  
不過作小詞工畫竹而已孟昶乃能表章六經立石  
成都洵有功於經學矣 又云蜀刻九經最為精確  
是時僭據之主惟昶有文學而蜀不受兵又饒文士  
故其所製尤善朱子論語注引石經者謂孟蜀石經  
也

吳任臣曰蜀廣政十四年詔勒諸經於石祕書郎張  
紹文寫毛詩儀禮禮記祕書省校書郎孫朋吉寫周

禮國子博士孫逢吉寫周易校書郎周德貞寫尚書  
簡州平泉令張德釗寫爾雅字皆精謹

按宋乾德三年收蜀送降款者通奏使伊審  
徵也草降表者翰林學士李昊也自昊以下  
從降者三十二人入除目者二十六人載句  
延慶續錦里耆舊傳而昭裔紹文朋吉逢吉  
德貞德釗皆不與焉

宋國子監石經

七十五卷

佚

江休復曰宋子京判國子監進禮記石經本

王應麟曰仁宗命國子監取易詩書周禮禮記春秋  
孝經為篆隸二體刻石兩楹 又曰至和元年八月

命皇姪右屯衛大將軍克繼書國子監石經以上所  
寫石經論語求書石國子監帝欲旌勸宗室特從其  
請二年九月工畢上之賜銀幣 又曰至和二年三

月國子監王洙言國子監刊立石經至今一十五年  
止孝經刊畢尚書論語見書鐫未就乞促近限畢工  
餘經權罷從之 又曰石經七十五卷楊南仲書周  
易十詩二十書十三春秋十二禮記二十皆具真篆  
二體 又曰嘉祐三年五月王洙薦大理丞楊南仲  
石經有勞賜出身六年二月國子監言草澤章友直  
篆石經畢詔補試將作監主簿友直不願仕賜以銀  
絹五月以同篆石經殿中丞張次立與堂除

周密曰羅壽可游汴梁見太學九經石板堆積如山  
一行篆字一行真字

長編嘉祐六年三月以篆國子監石經成賜草澤章  
友直銀百兩絹百疋除試將作監主簿辭不就故有  
是賜友直建安人得象之叔

葉適曰瑞安沈彬老北游程氏師生間得性命微旨  
經世大意時方禁春秋學石經甫刻即廢彬老竊賂  
守者自摹藏之後世孫體仁閣以皮焉名曰深明



朱翌曰本朝石經胡恢所書

顧起元曰胡恢金陵人博物強記善篆隸臧否人物  
坐法失官十餘年潦倒貧困赴選集於京師是時韓  
魏公當國恢獻詩自達魏公憐之令篆太學石經因  
得復官任華州推官而卒

按宋史藝文志又有楊南仲石刻三體孝經  
一卷

陳頴曰開封宋建都處予署府庠事見諸碑刻多宋

時太學中石經皆磨滅破碎罕有完者周視齋廡見  
石礎俱斷碑隱然文字在上

按宋太學石經在開封陳永之猶及見之惜  
未有好事者摹搨今則沈於黃河淤泥之下  
矣

胡氏元質重刻漢石經

佚

元質記曰漢靈帝時博士試甲乙科爭第高下至有

行路改蘭臺漆書經字者諸儒受詔於熹平成刻於  
光和俾天下咸取則焉碑高一丈廣四尺水經云立  
石太學其上悉刻蔡邕名隋志有一字石經七種其  
論云漢鐫七經皆蔡邕書史亦稱蔡邕自書丹使工  
鐫刻其書畫超詣要非中郎不能到也然至今存者  
體各不同雖中郎兼備衆體而篇章之富未必能辦  
於一人之手傳稱邕與堂谿典楊賜馬日磾張馴韓  
說單颺等正定諸經意者當時諸儒同涉筆於其間

不可知也歷年多更變故久陵遷谷變煨燼剝蝕之  
餘甚至取為柱礎為礮石者唐初魏鄭公首訪求之  
十不得一況於今哉茲來少城得墜刻於一二故家  
雖間斷不齊然殘圭裂壁亦可寶也因以鐫之錦官  
西樓庶幾補古之缺文云爾

宇文紹奕跋曰內翰胡公每以天下自任推六經精  
微寓諸日用至於屋壁所藏殘編斷刻收拾無遺常  
歎石經隸畫最古旁搜博訪合諸家所藏得蔡中郎

石經四千二百七十字有奇以楷書釋之又得古人篆隸三體石經遺字八百一十九並鑱諸石永貽不朽按史稱蔡邕自書丹使工鐫刻酈道元注水經亦云光和六年立石太學其上悉刻蔡邕名則一字石經出於邕筆似無可疑若夫三體石經以儒林傳考之其書已出於東漢時水經乃云刻之魏正始中意者魏刻殆以補漢刻遺亡爾

姓譜胡元質字長丈長洲人官至敷文閣學士

宋洪氏

述

重刻漢石經

佚

諸道石刻錄漢石經遺字在越州治蓬萊閣

洪适跋曰蔡中郎石經在承平時已不多見今京雒雍高慮其遂泯沒不傳也予既輯隸釋因以所得尚書儀禮公羊論語千九百餘字鐫之會稽蓬萊閣凡八石庶幾見者有是然之喜

吾丘衍曰石經遺字碑會稽蓬萊閣翻本破缺磨滅

不異真古碑今亡矣

按蓬萊閣重刻石經詳見漢石經下

蘇氏<sup>望</sup>重刻魏三體石經遺字

佚

婁機曰魏三體石經正始中刻今在洛陽者皇祐癸巳蘇望於故相王文康家得左氏傳搨本取其完者刻之凡八百一十九題曰石經遺字

經義考卷二百八十九